

# Namba

## 6

*Tokolkatien koa pris keil asani min meatin keil  
Namba 6:22-27*

<sup>22</sup> Iahova viteni min Mosis vit, <sup>23</sup> “Navong Eron ka natnali keitel telhesan tokolkatien min me-Isrel keil, keitel telhehiteni hemukok telhehit,

<sup>24</sup> ‘Iahova hetokol kat kami ka helei kat kami.

<sup>25</sup> Iahova hetahos min kami ka more envatien onen hel ven kami.

<sup>26</sup> Iahova helele hetahos en kami ka hesan tomat onen hel ven kami.’

<sup>27</sup> “Ka munak keitel telhesan tokolkatien min me-Isrel keil en isok, anatin eli, inau nitokol kat keil.”

*Me-Isrel keil yasi umai ka metai keil one asan sanien votut keil min Iahova. Evus, Ahi vis Mosis helei kan koakeil amul en vatiamal onen Livae keke imai ikataun pris keil. Navong kei mumoni evus, amumon Anien ten Mul Laui. Koanek vi sua tai kati koa amemea ran out Isip. Evus, mahmah onen Ahi mea ka mulamun keil uva en out tai vesesal en out Kenan.*

## 13

*Mosis sila meatin taleisuaian keil avales out  
Kenan*

*Namba 13:1-3,17-21,25-33*

<sup>1</sup> Iahova viteni min Mosis vit, <sup>2</sup> “En mari vatiamal teindan elu (12), kitie lat metai keil ikeka ran hetetamen sav keil keke kisila keil iha

ilei suai en out Kenan, out koa namul nasani min me-Isrel keil.” <sup>3</sup> Sakini, en out volvol en out Paran, Mosis long kat ren Iahova ka sila metai teindan elu (12) koa amul alei kat vangi me-Isrel keil.

<sup>17</sup> Navong Mosis sila lat keil, viteni min keil vit, “Miheha miheka koteh out Kenan, evus, mihelei rahat hou keil en usite. <sup>18</sup> Mihelei vis out. ? Atan enek mukave? ?Meatin keil avi houlu vuo arvitei houlu, keil ave keih vuo ave memerau? <sup>19</sup> Miheha mihelei visi. ?Out enek tahos vuo tisa? ?Meatin keil aro en taon keil koa vieh takeih karahiti vuo vieh tovuol ien? <sup>20</sup> Mihelei vis atan. ?Kei tahos vuo tisa? ?Ka vatiai keil avi houlu vuo atovuol? Miheha en rendemien koa hetahos ka mihendem kati navong mihemai ris, mihekur kat tei heiai koa amoul en out enek.” (Koanek vi avong koa hei grep keil mul men.) <sup>21</sup> Sakini, meatin keil uva ka alei suain out vasi: out volvol en out Saen koa mul en usite saot, uva arokol out Rehob, vesesal en out Hamat, en usite not.

<sup>25</sup> Meatin keil taleisuaien out amual alei vasin out Kenan avong hanumau elu (40). Evus, umai ris <sup>26</sup> ven Mosis, Eron ka me-Isrel vasi keil koa arosin keil en out volvol ten out Paran. Navong umai ris, aviten tounah koa alesi ka arie heiai keil koa akuri. <sup>27</sup> Keil aviteni min Mosis avit, “Komai meles out enek, ka atan teni tahos imok ka amas mul ien. Koanik vi heiai teni. <sup>28</sup> Ka meatin keil koa amul en out enek avi avkeih keil. Taon keil one emun amariso, ka vieh keil koa karahiti keih vis keih. Ka tisa mok, meles marmari meatin keil en out enek koa atetaveah koa aka en vatiamal onen Anak. <sup>29</sup> Me-Amelek

keil aro en usite saot, ka me-Hit, me-Sebus, ka me-Amor aro en hou keil. Ka me-Kenan keil aro vesesal ven atas ka out keil koa musil vali Oaisal Sodan.”

<sup>30</sup> Ka Kelep mai vesesal ven Mosis en meten meatin keil, mumon keil tine merau ka vit, “!Rovaha varei, rovakur out! !Veni rokileas rovou lin keil!”

<sup>31</sup> Ka meatin sav keil koa uva ral min Kelep avit, “!Vuo! Ir rorkeihte rovou lin keil. Meatin keil ten out enek, ave keih imok mulin ir.”

<sup>32</sup> Sakini asakin selusien ten luvosien karahit me-Isrel keil usil atan koa uva alesi koa sakin rendemien one mot. Keil avit, “Atan enek mul san matien min koakeil aro ien. Ka koakeil vasi koa aro en out enek atetaveah.\* <sup>33</sup> Komai meles keil ave marmarite ka atetaveah, melonge keke mesuval titi kal keil, ka keil iles komai hemukonek eli varei.”

## 14

*Me-Isrel keil aseseini keke avaha avakur atan koa Ahi vat kati min keil*

*Namba 14:1-10*

<sup>1</sup> En vongien enek, me-Isrel keil alonge tisa houlu ka amul amuai. <sup>2</sup> Keil asel kutut kat Mosis ka Eron avit, “Tahos imok munak komai mevamatmat en out Isip vuo en out volvol ekek. <sup>3</sup>?Vensa Iahova vit vakur ir rovaha en atan ekek? U vinvini ir ka ikur ahin keil orer ka titiali keil emun. Vahit vatahos imok keke rovaha ris en out Isip.” <sup>4</sup> Sakini, aviteni min keil eris avit, “!Rovatie lat etai meatin hemai hehi hetetamen orer ka reheha ris Isip!”

---

\* **13:32:** Sen 6:4

<sup>5</sup> Navong Mosis keilu Eron lulonge, luva netan min Iahova en meten me-Isrel keil. <sup>6</sup> Ka elu en koakeil ales out Kenan: Sosua koa natin Nan, keilu Kelep koa natin Sepuneh, keilu lulonge tisa ka lurali vas eisin omealu. <sup>7</sup> Ka luviteni min meatin keil luvit, “!Atan koa komai melesi tahos imok! <sup>8</sup> Munak Iahova hesi ven ir, kei hekur ir reheha en more atan enek, atan koa tahos imok ka amas mul ien. <sup>9</sup> Minahilestei eisilumi ran Iahova<sup>☆</sup> ka minametauntei meatin keil koa amul en out enek. Ahi hesakin ir rehous keil hemaes enges veni ro ral min ir ka kulat tounah koa ring koe keil tuai. Anatin, minametautei.” <sup>10</sup> Meatin vasi keil en out enek amul avit avov keitel telvamat. Ka hatte tas, muohien onen Ahi kistal en Eim Tavolin onen en mete.

*Ahi san mahien min me-Isrel keil vit ual tetoun sua hehi hanumau elu (40)*

*Namba 14:26-35*

<sup>26</sup> Iahova viteni min Mosis ka Eron vit, <sup>27</sup> “? Meatin keil ekek isel kutut kat nau hetokol nengeis? !Inau naraengon selkututien keil one vinvin! <sup>28</sup> Milhehit mesein selusien enek min keil milhehit, ‘Navat kati hehi anatin, tounah vasi koa tisa koa lises mimul mivit namumoni min kami, kei varei numoni hemai hehi anatin. Inau Iahova naselus. <sup>29</sup> Kami vasi mihematmat ka teiai keil onami il retai en out volvol ekek.<sup>☆</sup> Anatin, kami koa misel kutut kat nau, koa sua onami mulin hanumau (20), <sup>30</sup> mihervatei mun en atan en out enek. Anatin keke navat kati nisani min kami, ka mihervatei ien. Kelep enges keilu Sosua luheha en out enek. <sup>31</sup> Kami mivit

<sup>☆</sup> 14:9: Hib 3:16    <sup>☆</sup> 14:29: Hib 3:17

meatin keil ten out enek ihuli kat titiali onami keil. Ka inau nikur titiali onami keil iha keke umon teim se en atan koa kami milei seseini. <sup>32</sup> Ka kami, mihematmat en out volvol ekek. <sup>33</sup> Titami keil iles ual tetoun en out volvol ekek sua hehi hanumau elu (40).<sup>☆</sup> Ka ven mirvitei anatin minau, keil ilong mahien hetokol avong koa kami vasi mihematmat. <sup>34</sup> Mihean hei tisaen onami sua hehi hanumau elu (40), sua tai ten avong keil koa avi hanumau elu (40) koa meatin onom keil alei vasin out enek. Miheilea inau suk ka vati vurohien onak. <sup>35</sup> Navat kati keih keke numon tounah ekek min kami, meatin tisa keil koa mimai en rendemien tas va kat inau. Sakini, en out volvol ekek, kami vasi mihematmat. Anatin eli, inau Iahova namul naselus.’ ”

<sup>36</sup> Evus, koakeil Mosis rie lat keil keke avaha avalei suain atan enek, koakeil vasi umai ris ka asan selusien tisa va kat atan enek, <sup>37</sup> Sakini, Ahi sakin mari mesaien tai mai ka muas keil umat. <sup>38</sup> Ka, en meatin taleisuaien keil koa uva en atan enek, Sosua (natin Nun) keilu Kelep (natin Sepuneh) enges lumoul.

<sup>39</sup> Navong Mosis vit mesein selusien onen Iahova min me-Isrel keil, keil vasi amurang ka amurang. <sup>40</sup> Sakini, out mulan, keil amemea ka asak mesein keil keke avaha avakur atan ten out Kenan, out koa hou keil amul ien. Uva mau ales Mosis ka aviteni mini avit, “Komai melel kilea tisaen onomai. Sakini, reheha rehekur atan koa Iahova vat kati min ir.”

<sup>41</sup> Ka Mosis vit risi min keil vit, “?Vensa varel kami mimules mirali koteh mengkatien keil onen Ahi? !Misakras mivakur atan enek!

☆ **14:33:** Umen 7:36

<sup>42</sup> Minahatei, veni Iahova rrotei mun vatal min kami. Minamaen vativieh keil onami anu vini kami en vaeen. <sup>43</sup> En out enek, mihehisu min me-Amelek keil ka me-Kenan keil emun, ka keil isal vini kami hetal min naef tavaeen keil one. Keil umoni hemukok veni kami milokovein Iahova tuai. Sakini, kei emun lokovein kami.”

<sup>44</sup> Ka avaseini keke Mosis viteni mukok, keil uva en hou keil ten out Kenan keke avakuri. Uva, avaseini keke Mosis ka Bokis ten Hatkatien Takeih onen Iahova lurmusiltei keil, lumules en out koa amumon tavolin keil ome eni. <sup>45</sup> Ka me-Amelek keil ka me-Kenan keil koa amul en hou keil ekek, umai uvae ral min keil ka amu lin me-Isrel keil. Anatin, keil alikat rasilin keil soutin va rokol out koa avise en Hormah.

*Evus, me-Isrel keil koa amules aviles ka amusil Mosis ka Eron koa Iahova rie lat keilu keke luvahi avat one. Amusil keilu va vio ... rokol avong aro en out volvol sua hanumau elu (40). Ka keil avisu en avong takeih keil houlu en ualien one.*

## 20

### *Oai kistal ran ahat en out memes Namba 20:1-12*

<sup>1</sup> En avati koa mulamu ten sua hau, me-Isrel keil umai en out volvol ten out Saen, ka amumon votevav one en out koa avise en Kates. Ka en out enek, Miriam, ahinali Mosis, mat ka arahini. <sup>2</sup> En out koa aro ien, oai tovuol ka meatin keil umai akarahit Mosis ka Eron <sup>3</sup> ka aselus kutut kat Mosis avit, “Tahos imok keke komai mivamatmat en hen Iahova, navong mu vini onomai keil en metareh ten Eim Tavolin onen. <sup>4</sup> ?Vensa komulamun komai memai en out

volvol ekeke keke mevamatmat vatal min buluk ka sipsip esomai keil? <sup>5</sup> ?Vensa komulamun komai romemea ran out Isip keke romai en out koa vi heite hon? ?Kilesi? Ekonek, anien tovuol ka heiai tovuol.\* !Ka oai tovuol emun rovamuni!” <sup>6</sup> Mosis ka Eron lumea ran meatin keil ka luvati keilu en metareh ten Eim Tavolin. Luvita netan, naealu vita rokol atan, ka lules muohien onen Iahova ritin kistal en keilu.

<sup>7</sup> Iahova viteni min Mosis vit, <sup>8</sup> “Kikur eisal onom ka milhehiteni min meatin keil imai out hetas. En mete, kiselus min mari ahahat en vili kei va keke oai voue rani. En sakien enek, kisan oai min keil imuni ka min buluk ka sipsip emun keil ese.”

<sup>9</sup> Sakini Mosis va, kur eisal onen ran Eim Tavolin suval koa Iahova meng kati. <sup>10</sup> Evus, Mosis ka Eron luvise ruain meatin keil uva vesesal ven mari ahahat enek, ka Mosis selus keih min keil vit, “!Kami koa mivi uti selkututien, mihetaengonau! ?Mukave, milhekur oai ran ahahat ekeke ven kami?” <sup>11</sup> Evus, Mosis mutelan eisal koa vuli kati, muas ahahat enek eni hatte elu, ka mari oai mue rani. Sakini, meatin keil vasi amuni ral min buluk ka sipsip keil ese.

<sup>12</sup> Ka Iahova viteni min Mosis ka Eron vit, “Ven desien onamil enau rovinvintei keke milvahouhou en hivotutien onak en meten me-Isrel keil keke milromusil kattei asa naviteni, milhermulamuntei mun keil iha en atan koa inau navat kati min keil.”

*Matien onen Eron  
Namba 20:22-29*

---

\* **20:5:** Selusien kati vit “uit, fik, grep, ka pomegranit.”

<sup>22</sup> Me-Isrel vasi keil alokovein out Kates ka uva akistal en Vatihou Hor. <sup>23</sup> Ekonek, en hakot ten out Edom, Iahova viteni min Mosis ka Eron vit, <sup>24</sup> “Eron hervatei en atan koa navat kati min me-Isrel keil. Kei hemat veni kamil milromusil kattei asa nameng kati min kamil en out Meribah. <sup>25</sup> Sakini kikir Eron hetal Eliesar koa vi natnali, mithehina en Vatihou Hor. <sup>26</sup> Ekonek, kikulat eisin keil ten pris ran Eron, kisin eni en Eliesar. Ka Eron, kei hemat en out enek.”

<sup>27</sup> Mosis musil asa koa Iahova meng kati mini. Ka en meten meatin vasi keil, keitel telvina en Vatihou Hor. <sup>28</sup> Ka Mosis kulat eisin ten pris ran Eron ka musin en Eliesar eni. Ka en out enek, en hoi hou nesa, Eron mat.✧ Ka Mosis keilu Eliesar lumita ris netan. <sup>29</sup> Navong me-Isrel vasi keil akur longlongien keke Eron mat, keil vasi arangisi, ka araleh matien veni avong hanumau tai ka halualim emun (30).

## 21

### *Ahi sakin tetal tisa keil avat me-Isrel keil Namba 21:4-9*

<sup>4</sup> Me-Isrel keil alokovein Vatihou Hor ka amusil sise koa va en Atas Tahilhili. Amumoni mukonek ven e vati avakarahit atan esen me-Edom keil. Ka navong amul semau en sise, tine tamurei. <sup>5</sup> Sakini aselus kutut kat Ahi ka Mosis avit, “? Vensa kokulat komai ran out Isip ka komulamun komai en out volvol mevamatmat? En out enek, anien ka oai tovuol varei. !Anien tisa enek, emai rovattei mun!” <sup>6</sup> Sakini Ahi sakin tetal tisa keil houlu uva ven keil ka akat houlu en me-Isrel

---

✧ **20:28:** Eks 29:29; Nam 33:38; Dut 10:6



keil umatmat.✧ <sup>7</sup> Navong amul umatmat mukok, keil umai ven Mosis ka avit lat tisaen one avit, “Komai memum tisa navong meselus kutut kat Iahova ka keik. Kihis eli min Iahova hekulat tetal keil ihaha.” Sakini Mosis vis ven meatin keil. <sup>8</sup> Evus, Iahova viteni min Mosis vit houmon hati aean tai hekur niniven tetal ka heti kati hel en ai tai. Hesakini navong tetal heat meatin tai, helele hehina nesa helesi ka hemai ris hetahos. <sup>9</sup> Sakini Mosis mumon tetal tai en aean tai koa avise en brons ka muti kati en ai tai. Ka meatin keil koa tetal kat keil, navong alele vina nesa ales tetal enek, umai ris atahos.✧

## 22

*Asuv houlu ten out Moab vis Balaam vas-esenda en me-Isrel keil*

*Namba 22:1-8,12-21,28-35,39-41; 23:1-12; 24:10-25*

<sup>1</sup> Me-Isrel keil uva ka amumon votevav one en aet ten out Moab, en usite ten Oaisal Sodan koa teisav en usite koa taon ten out Seriko mul ien.

<sup>2</sup> En avong enek, asuv houlu ten out Moab, isen Balak, natin Sipor, kei longe mukave me-Isrel keil amu lin me-Amor keil ka longe mun keke avi houlu ramat. <sup>3</sup> Sakini kei ka meatin keil onen ametau houlu ven keil. <sup>4</sup> Me-Moab keil aviteni min hetetamen keil onen me-Mid keil avit, “Tali meatin keil ekek, hervitei tuetin, ian vasi tounah koa mul rahat ir, asuval buluk tai koa mul kan vasi oumunai en vieh onen.”

Sakini asuv houlu Balak <sup>5</sup> sila eiloheh keil onen uva avahise Balaam, natnali Beor, koa ro en taon ten out Pethor, vesesal ven Oaisal Upretis en

---

✧ **21:6:** 1Kor 10:9 ✧ **21:9:** 2Ki 18:4; Sion 3:14

atan ten out Amao. Keil akur selusien onen asuv houlu Balak mai veni koa vit, “Tali meatin keil koa mariso ramat aka en out Isip. Meatin keil teni amul asien vasi out, ka amul asak avalah lat atan osor. <sup>6</sup> Keil avi houlu mok amulin ir. Sakini napeahik eli kovamai kovasesenda en keil en usite onak. Hesakini, ir rokilea rovou lin keil ka rovalikat keil avamea ran atan osor. Namul navisuk veni nakilea keke koakeil koviten tokolkatien va min keil, keil enek akur tokolkatien. Ka koakeil kosesenda en keil, asas koviteni mai kistal vi anatin.”

<sup>7</sup> Navong hetetamen keil onen me-Moab keil ka onen me-Mid keil uva ven Balaam, akur uite ten sesendaen ral min selusien onen asuv houlu Balak. <sup>8</sup> Ka Balaam viteni min keil vit, “En vongien kosa, mihetos hetal minau. Ka visuvong, nihiten asa koa Iahova hehiteni minau.” Sakini hetetamen keil enek aros ral min Balaam.

<sup>12</sup> En vongien enek, Ahi viteni min Balaam vit, “Konahatei natal meatin keil keisom, ka konoumoutei sesendaen min me-Isrel keil, veni tokolkatien onak mul en keil.”

<sup>13</sup> Out mulan eris, en visokon, Balaam va ven eiloheh keil onen Balak ka viteni min keil vit, “Alha ris teim. Iahova seseini keke inau maha vatal kami.” <sup>14</sup> Sakini uva ris ven Balak ka avit meseini mini keke Balaam seseini vousil keil.

<sup>15</sup> Sakini Balak sila ris hetetamen oteta keil emun koa avi houlu mok ka avi hetetamen amulin koakeil amulamu. <sup>16</sup> Keil emun uva ven Balaam ka aviten selusien onen asuv houlu Balak mini avit, “Napeahik eli keke konamaentei tounah nating koek kovamai venau. <sup>17</sup> Nisan uite hehi houlu vis hehi houlu mok minuk, ka tounah

sa koa kihis nau eni, numoni minuk. Napeahik kimai li ka kisesenda en meatin keil ekek en usite onak.”

<sup>18</sup> Ka Balaam vit kesi min keil vit, “Avaseini keke Balak hesa vasin silva ka gol ten mari eim onen minau, nasakras malong sesein etai titi selusien ten mengkatien onen Iahova. <sup>19</sup> Ka kami mihetos en vongien koanik hesuval tuomi keil amumoni. Hesakini, inau nakilea mailea keke Iahova hesan ris etai selusien minau mahiteni min kami.”

<sup>20</sup> En vongien enek, Ahi mai ven Balaam ka viteni mini vit, “Munak meatin keil ekek imai avahisuk kovaha, kisas mesei ka kiha hetal min keil. Ka kumon asas varei koa nihiteni minuk.”

<sup>21</sup> Out mulan en visokon, Balaam sak mesein dongki esen ka musil hetetamen keil ten out Moab.

*Anatin keke Ahi maen Balaam vousil hetetamen keil ten out Moab, ka Ahi lei kilea rendemien onen Balaam koa en vati mok vakur uite ten sesendaen. Ven rendemien ten metenan onen,✧ Ahi sila angelo tai onen keke vating koe sise onen. Balaam mul rondan en dongki esen ka reingeingeni keke angelo ring koe sise. Dongki enges lesi ka vati. Navong vati mukonek, Balaam tin katiat ka muasi. Avong etel mumoni mukonek, ka Balaam mul esuk muasi keih.*

<sup>28</sup> Evus Iahova sakin dongki kilea vaselus, ka viteni min Balaam vit, “?Namumon sa minuk? ? Vensa komuas nau hatte etel?”

✧ **22:21:** 2Pit 2:15; Siud 1:11; Rev 2:14

<sup>29</sup> Balaam vit kesi mini vit, “Veni keik kosakinau namemou vareis en meten hetetamen keil ekek. Vahit makur naef, kosa, masahuk kovamat.”

<sup>30</sup> Dongki vit kesi mini vit, “Inau navi vati dongki etin koa komul komuloh eni lises en moulien onom. ?Mukave, namumon sakien koanik minuk mulamu?”

Balaam vit, “Vuo.”

<sup>31</sup> Evus, Iahova maen Balaam les angelo onen vatimal ral min naef onen. Navong Balaam lesi, mot va netan ka nan rokol atan. <sup>32</sup> Evus, angelo vis katiati keih vit, “?Vensa komuas dongki esom hatte etel mukok? Numai mating koek veni sise onom romaltei en meten Ahi. <sup>33</sup> Ka dongki esom les inau ka viles hatte etel va en usite. Vahit varvilestei, inau mou vinik ka mamaen dongki vamoul vaha.”

<sup>34</sup> Balaam vit kesi mini vit, “Inau namumoni eli romaltei. Nareingeingeni keke keik kovatimal en sise kovating koe inau. Ka ekek, munak kovit tisa keke inau maha, niha ris teim.”

<sup>35</sup> Ka angelo viteni vit, “Kiha hetal meatin keil ekek, ka kihiten asas varei koa naviteni minuk kovahiteni.” Sakini Balaam musil ris keil uva.

<sup>39</sup> Ka Balaam va ral min Balak en taon ten out Husot. <sup>40</sup> Ekonek, Balak muas buluk ka sipsip keil ka san hatte koa min Balaam ka hetetamen keil emun koa uva ral mini.

<sup>41</sup> Out mulan eris, asuv houlu Balak mulamun Balaam luvina en hou ten out Bamot-Baal. En out enek, Balaam kilea vales tei en me-Isrel keil.

## 23

<sup>1</sup> Evus, Balaam viteni min Balak vit, “Umon avet tasanien votut oulu (7) ekok, ka kikir buluk oulu (7) ka sipsip emun koa vi meahos hehi oulu (7).”

<sup>2</sup> Balak mumoni suval koa kei viteni, ka keilu Balaam, lumumon sanien en buluk ka sipsip en avet retai keil ten sanien, ka lumunit keil. <sup>3</sup> Evus, Balaam viteni min Balak vit, “Kilomal ekok hetal min sanien votut onom. Ka inau, maha malei visi keke Iahova vahisu vatal minau. Asas koa hehothot eni minau, nimai ris nihiteni minuk.” Sakini, kei enges vina nesa en hou. <sup>4</sup> Ekonek, Ahi visu mini ka Balaam viteni mini vit, “Inau namumon ahor ten sanien oulu (7) ka namunit retai en buluk ka sipsip keil ien.”

<sup>5</sup> Iahova viteni min Balaam selusien koa heha hehiteni min Balak. <sup>6</sup> Evus, kei va ris, les Balak mules mulomal vesesal ven ahor ten sanien onen ral hetetamen keil ten out Moab. <sup>7</sup> Balaam vit mesein ren Ahi vit:

“Asuv houlu Balak kur nau  
 ran hou keil ten out Aram en usite ist.  
 Kei vise inau vit, ‘Amai selus en usite onak.  
 !Kisesenda en me-Isrel keil!’

<sup>8</sup> Hemukave nisesenda en koakeil koa Ahi rosendatei en keil?

Nasakras masan mahien min koakeil Iahova rosantei mahien min keil.

<sup>9</sup> Navong naro en hoi hou nesa, nakilea matapehai en keil,

namul en vatihou nesa ka nalei usil keil.

Keil avi meatin sase enges,

akilea keke tokolkatien mul en keil mulin kantri savsav keil.

10 Vatiamal keil koa akikistal ran Siekob avi houlu suval vulimeas; me-Isrel keil, asakras avahuli keil.

Navong moulien onak hevus, ek vat keite teni hesuval tai en meatin keil ekek onen Ahi. Ek vati nimat en tomat hesuval koakeil enek koa amutolas en meten Ahi.”

11 Evus, asuv houlu Balak viteni min Balaam vit, “?Komumon sa minau? Nakuruk kumai ekok kovasesenda en koakeil avi vativieh ral nau, ka keik kosan tokolkatien esuk min keil.”

12 Ka Balaam vit risi mini vit, “Inau nihiten asas varei koa Iahova viteni minau maselus eni.”

*Asuv houlu Balak kur Balaam luvina en hou elu sav eris keke Balaam vasak visi vasesenda en me-Isrel keil ien. Ka en avong vasi, Iahova maeni vasan selusien ten tokolkatien enges va min keil.*

## 24

10 Navong Balak raengon selusien onen Balaam, pulin hen en vurohien ka viteni mini vit, “!Navisok kovasesenda en koakeil avi vativieh minau, ka avong etel ekek, keik korokol kat keil! 11 !Keitinek, kiha ris teim! Inau navat kati nisan uite minuk, ka Iahova sakinuk kosakras kovakuri.”

12 Balaam vit kesi mini vit, “Inau naviteni tuai min eiloheh keil onom koa kosila keil umai venau keke 13 avaseini kisani minau silva ka gol vasi keil koa mul en mari eim omom, inau nasakras malong ras mengkatien onen Iahova. Anatin, nasakras moumon etai tounah koa tahos vuo tisa inau sasok enges, ka nakilea nihiten asas koa Iahova viteni minau mahiteni.”

14 Evus, Balaam viteni min Balak vit, “Kosa, inau niha ris ven meatin onak keil. Ka hekatau niha, inau nisan selkatien minuk usil asa koa me-Isrel keil umoni min meatin keil onom en avong koa veite veah.” 15 Evus, kei vit mesein ren Ahi enek mini vit:

“Koanik vi selusien onen Balaam natin Beor,  
selusien onen meatin koa lei kilea en tounah.

16 Koanik selusien onen kei koa mul long kilea selusien onen Ahi,  
ka mul kur ileilien ka ven Ahi ten out nesa.  
Selusien enek ka ven kei koa les matil vovoi en  
keil ka romatildei,  
koa kur leisanien ka ven Ahi ten Keihoen:

17 Inau nalele soutin, en avong keil koa hemai veah,  
ka nales kantri ten out Isrel.

Nales asuv houlu tai koa hekistal ien koa hesuval hitu koa vihil tahos imok,  
kei hekistal hehina nesa helosil kat me-Isrel keil.

Hou vasin hetetamen keil ten out Moab,  
ka hou lin vasi meatin keil ten out Set.

18 Kei hou vini me-Edom keil  
ka hesakin me-Seir keil itovuol emun.

Houmon atan ese hemai hehi onen,  
ka keihoen onen me-Isrel keil hel lises.

19 Kei koa heka ran me-Isrel keil hehitan en koakeil avi vativieh eni,  
ka u vasin meatin sav emun keil ten taon ten out Ir koa amoul amules.”

25 Evus Balaam mea ka va ris teim sen. Ka Balak emun, va ris en sise onen.

## 27

*Ahi rie lat Sosua vamai vakur vulin Mosis*

*Namba 27:18-20,22-23*

<sup>18</sup> Avati keil muli, ka Iahova viteni min Mosis vit, “Kikur Sosua,<sup>☆</sup> natin Nun, koa vi tinahos ka ninin onak mul ien. Kitokol kati <sup>19</sup> ka kumoni helomal en meten pris Eliesar ka en meten meatin vasi keil. Ka navong komumoni mukok, kihit meseini min keil keke kei hekur vulum. <sup>20</sup> Ka hiasuvien koa mul en hem, kisan hatte tai mini vasakin me-Isrel keil ilong kati.”

<sup>22</sup> Sakini Mosis musil asa koa Iahova meng kati mini. Kei ling Sosua mulomal en meten pris Eliesar ka en meten meatin emun keil. <sup>23</sup> Ka musil ren Iahova, Mosis rokol kati ka vitehiteni keke kei hekur vulin.<sup>☆</sup>



**Paama Bible**  
**Portions of the Holy Bible in the Paama Language of**  
**Vanuatu**  
**Certaines parties de la Bible dans la langue Paama**  
**de Vanuatu**

copyright © 2011 Wycliffe Bible Translators, Inc.

Language: Paama

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 9 Oct 2020

e4d59815-486c-529e-8bd4-ce3980ae5535